

海龍縣志

第十冊

海龍縣志卷二十一

軼聞

古者記錄異聞叙述雜事之作代有其人而各爲專集者多矣如搜神述異宣室酉陽等之誌怪世說語林因話瑣言等之雜錄其傳於世者今已不可勝紀此皆史乘之別裁而亦記述之一端且爲從來修史諸家所不廢者惟於誌乘是爲有系統之記載凡有所記莫不使其以類相從所以示條貫之不可紊也而天下事萬有不齊竟有爲各類所難附入者焉若使類不類以爲類齊不齊以爲齊不論何事都以相附如此則史例破而史體乖矣而其事置之則嫌遺佚載之又無貫序古人所以於各類之外別闢一門以紀其事斯曰軼聞

故凡事之不屬於各類而含有怪异及閑話之色彩者悉以載之是以誌軼聞

軼聞

民國七年六月山城子東街路南天興福雜貨店翻修肆房承塵上得梟鳥一見人飛去不知此梟何時飛入並無人見俗謂此鳥所止不祥未數日架屋木落壓斃一日工(俗名小工)別無也異以爲當之矣此房乃余(王澤南)左鄰巴雲程者將十年此房分屬其出繼長子巴延齡分僅一載餘一家竟滅禍乃驗先是雲程生四子其兄早亡無子乃以長子延齡爲之嗣時八九歲稍長漸不循分初僅從鄰里亡賴少年遊猶畏其本身父數年後則日與市井不逞蔑片伍

頗爲鄰里患吸烟宿娼用金錢如泥沙民國十四年忽往海龍以千金聘律師張西豐在海龍地方審判廳告其本生父爭分財產既分此房恰歸延齡得財產益肆遊蕩揮霍浪擲千金脫手不數月有一子竟殤狎一女伶水鮮花友一降匪楊子餘楊年二十三歲短小白晰常至其家不避內外民國十五年舊五月十四日延齡已在水鮮花家數日不歸揚於二日前忽託故至其家不去其妻用函促其回家延齡遂於是日傍晚歸晚九時正在室與其妻臥吸鴉片楊坐地下板櫬上閒談被匪入室用槍擊斃捕楊追究遇赦得釋其妻舊家女不能守志亦再醮去夫梟食母又能毀室其戾氣已見於十年前昔賈誼居長沙鵬集承塵上因畏死作鵬賦蓋鵬集承塵乃其偶

止且必有所可入處非如此之不能止無可入且止而解轂竟無人見者事之反常者爲妖况爲梟乎因錄之以告來者俾知見怪宜修省戒惕以弭其咎焉

雙頂山市

距縣治十餘里有雙頂山焉在縣治之東南庚辰正月忽於山巔現出二城南山巔之城有樓有堞北山巔之城樓堞俱無然行人往來皆歷歷可數論者謂爲折光然此山之就近亦無此城此城之狀況又大非海龍之狀況也

魚精噬人

距縣治六十里地名黑咀子在縣治之西該地有水泡一深不測底

內有黑魚長丈餘一日出而曝日村人以火槍遙擊之魚詐死村人抵魚前將欲捉魚以尾捲村人入水而噬之厥後無有敢再捕魚者此開闢未幾之事也

乳山蛇異

縣治之東有乳山距城五里許山上蛇最多又最異游山者至此蛇見之不遁其旁若無人之概大有王景略之風半山有一小閣據該山道士言閣爲蛇仙所居人至此不許吸菸飲酒蓋蛇仙係理教云

古錢

清光緒二十九年建修書院文廟時開築地基曾挖出古錢千餘串每串百枚徑寸餘其端均有小錢十六枚大如通行之制錢文曰崇

寧通寶字樣出土時錢質極軟須叟則堅硬如恒矣

蝮蠹不生

蝮蠹一物到處皆有惟本境則無每值秋初有小販籠蝮蠹而來人皆爭購之以爲稀罕物也豈氣候之關係歟抑地理之關係歟姑志之以俟學理之研究

旋風案

清宣統年間邑人有王財者其妻與劉秧子通姦多年嫌其年老夫妻反目是年其妻四十歲王財五十四歲遂用紅礬入麵湯內與之食王財遂斃命事起時里人皆知惟王財之弟性懦弱畏劉之勢未敢發越二年（卽民國元年）遼陽白永貞來守茲土遣人緝煙犯將

劉與姦婦逮案將釋而王財弟婦控發前事及詣尸場比開棺陡有旋風從知府之座後而起初起高尺許從人云有旋風知府云果有鬼耶言未畢而大風陡起飛塵遮蔽天日衆皆驚詫時民國元年七月天氣暑熱張傘以蔽日光猶汗滴如雨及歸署提訊姦婦適閤科長濟安自頭門外來見姦婦身後有旋風隨之自大堂而返又復轉回而入二堂訊問姦婦初不承認俄而自云要把我勒死了遂卽供認用毒藥害死王財案遂定此旋風案之大概情形也事雖奇怪而案屬眞實故誌之

胡仙顯盛

清光緒二十七年忠義軍圍攻縣城匪衆十餘萬官軍力不支城垂

破匪黨忽退怯適游擊馬隊管帶馮佩君由朝陽鎮來用術得匪之口號混入匪黨中從東門入匪以其爲同類也隨之而入者百餘至關帝廟前圍以兵縛以繩匪言見城上官兵如林戴紅藍頂者櫛比心胆幾喪彼時城中官兵無幾疑爲胡仙顯盛蓋城中胡仙堂最多也事後匪黨陸續被獲所言皆同而從鄉村來者亦道匪黨路過鄉村群言城上戈戟如林之事始以顯盛爲眞也士民感胡仙之恩爲之重修廟宇送匾額一方曰神靈默佑刻對聯一付曰派衍塗山威顯海國駕臨蓬島德被龍城云

生而能言

邑南城水河子村有姜子楊者於清宣統元年三月二十八日生一

女甫降生卽能言自稱伊係某村馬氏老媪同鄰媪某逛廟行至姜姓門口適值犬吠伊向門內一避則身已嬰兒而且女也言其家世甚悉其母與之乳不食惟向其母索饅後經其母勸曰汝初生尙無牙齒舍乳詎能活伊始食乳彌月後其母携其旋里（此女生在河南差次）路經馬氏村伊婉商其母欲至馬氏家一顧母允之及至馬家向其前生二子云有地照一張藏在某檐頭上二子去取果然今此女已三十二歲矣適本縣山城鎮鮑氏承名猶能記憶其前生之事云

飛龍在天

民國十七年十一月十六日午夜（卽戊辰年十月初六日丑初）突

於本縣西關奉海車站處見西南方繞長庚星下若匹練之橫空長
二丈有奇俄而赤光閃爍照耀天地有一物鯉頭龍尾口眼畢具鱗
甲顯然視之則金彩奪目此時候車之人甚夥皆目之爲龍但此物
罕見是否爲龍尙未可知也按金史衛紹王大安元年正月辛丑飛
星如火起天市坦有尾迹若赤龍又按搜神記劉聰僞建元元年正
月平陽地震其崇觀陷爲池水赤如血赤氣至天有赤龍奮迅而去
流星起於牽牛入紫薇龍形委蛇其光照地落於平陽北十里視之
則肉臭聞於平陽長三十步廣二十七步肉旁嘗有哭聲晝夜不止
數日聰后劉氏產一蛇一獸各害人而走尋之不得頃之見於隕肉
之旁俄而劉氏死哭聲自絕以此考之龍之發現非創見也

海龍縣志卷二十二

藝文

文章雖美賤則弗傳古今來多少文人其淹抑於此公例者蓋亦多矣昔者簡齋袁太史嘗謂人能傳寒士之片言隻字者其功德將遠勝於掩遺骸塵枯骨者焉三復斯言竊嘗痛之顧此安得有如此之人具大法眼施大法力盡收大千世界孤寒之遺佚使其豪情逸致雅趣幽懷併傳於不朽也豈不快哉然必求其人於今世則恐所難得者也夫文章之顯晦要亦有幸有不幸乎若彼得志諸公之賡颺盛治及潤色宏猷也其文章將隨功業而並顯矣士之幸者茲姑不論只惟孤寒庶士壯不如人老將何用事既無成文何以顯即七步

八叉只以博豎子村夫之嗚噓雕龍繡虎徒以召山魃木客之椰掄
鏤月裁雲技成而難圖一飽陽春白雪歌好而誰証同聲太玄文覆
瓿奚恤乞米帖投溷何禁已矣乎匠石未逢忍使華國文章虛填草
莽輶軒莫遇空教嘔心詞賦頓委灰塵如嘯月吟風固寄閑情於無
用而醫時砭俗豈宜土苴之同輕嗚呼人事於斯世情可卜此豈非
斯文之困否而亦吾道之屯蹇也哉宜乎雕蟲小技常爲壯夫所不
屑也無如誌乘方面則以結習相沿嗜痂不厭每痛夫宏文之不彰
寒峻之不傳也爰爲力事搜括凡於文賦詩歌之足矜者無拘其爲
出之於士類與否卽或輿臺下走方外深閨曾擅一藝之長者亦莫
不矜其所作並以傳其爲人庶以抒其淹抑此其功德不愈於饑佛

恤僧掩屍埋骼者乎凡所收諸藝分文賦詩詞爲四類併爲傳其藝
以及其人焉嗟夫其文之傳斯亦其人之幸歟爰爲誌藝文

課士

呈爲請舉行舊文社課士以資觀感而期競進事竊本縣於民國十
年經職商請前縣長湯 胤立求是文社仿早年書院課士辦法按
月考試將取錄者分列等第榜示拔前者有獎凡各學校校長教
習學生及家居自修之士皆得應試其所試科目爲國文經義策論
科學中除不能以書面考試者外皆得出題間或附帶試以詩歌以
提倡風雅每課出題由社長臨時自定以本縣

縣長爲社長遴有學問之士紳爲評議員董理每課考試事宜設評

議員不限額數兼備社長無暇時參閱課卷評判甲乙自此文社成立後考試數次士氣文風爲之一振詎行之未久固獎賞無出遂中止頗失多士之望今我

縣長爲文學名家博極羣書學通中外多士仰瞻共切親炙之志擬請舉行求是文社分琴堂之餘裕爲雪案之甄陶則斯文之幸也謹請

縣長 公鑒

計開求是文社課士辦法

- 一 每月以第二星期第四星期爲考試之期
- 一 每課考試或借各校局試或令領卷在外作課由社長隨意行

之但局試須先一日佈告以便自備筆墨赴試（佈告用牌示）

一 各鎮鄉學校校長教習學生路遠不及來城考試者准於前一星期報名寄與題目各在本校作課限本課期後之一星期內將課卷送到另行榜示取錄幾名獎賞幾名由社長定之其路遠自修之士亦得附於臨近學校就所寄之題應試應課者須先一星期向本社報名以便隨題寄與課卷

一 課期由本社前一星期牌示考課者於課期前三日內報名

一 試卷由本社代購應試者須自備卷資以防領卷拋棄

一 課試取錄分爲三等擬定一名至三名二等三名至六名餘均歸入三等

一 獎額一等第一名奉大洋六十元餘四十元二等第一名三十元餘得酌獎二十元至十元或獎給筆墨書籍其取列三等者除第一名得給獎外餘均不給獎

一 每課將取錄之佳作抄錄隨榜宣示

一 局試每課須先委評議員二人以上監場社長能否監視者聽

一 局試社長暨監視之評議員外他人不得隨便出入

一 局試須派警四名守門應試人不得隨意出外他人不得闖入

一 榜示後所取列一二等之試卷社長得當堂發落示以鍼渡各

一 評議員亦得設座憑几發落但已經一人發落者除社長外他

人不得再行發落

一 以上所擬之章程如有應行增減隨時酌定

(一) 本社經社長諭令另舉副社長一人擔任籌款公推王蔭棠充

王蔭棠之共評議員八員社長遴派四人公推四人

海龍縣志編察館館長王蔭棠

海龍縣志編察館協修劉順則

海龍縣志編察館協修鄭國僑

海龍縣財政局監察員王國翰

海龍縣速成師範學校校長馬良山

中華民國十八年十一月十八日

敬覆者所擬提倡文藝恢復求是文社斯文有幸極表同情 筠生學

植久荒簿書無暇如不以菲薄見棄忝列名譽社長可也其社長一
席卽屈

台端俯爲担任至評議回員劉君晴樸鄭君康侯王君樹屏羅君宜
吾學貫中西識博今古以椽筆而斧削後進是亦先覺之責也辦法
畧爲修正用請與

高明一權商之究於何時成立爲宜并請
見覆爲荷此致

王館長澤南先生

附修正辦法

李筠生再拜

擬求是文社課士辦法

一、本辦法以提倡文藝獎進後學爲宗旨

二、本社設名譽社長一員由縣長担任之社長一員由縣志館長担任評議四員由社長委託之均係義務職

三、每月考試二次其期限由社長酌定之社址暫附縣志館內

四、無論學校校長教員學生或自修之士一經報名均得與試每試於一星期前將題目寄與報名各生定期交卷

五、課期卽交卷期由本社前一星期牌示俾衆週知過期交卷者不錄

六、試卷由本社代購應試者須自備卷資以防領卷拋棄

七、課士取錄分爲三等擬定一等一名至三名二等三名至六名餘均歸入三等

八、成績優良得由社長募款或名譽社長捐廉分等隨意發獎賞之

九、每課將取錄之佳作抄錄隨榜宣示以示優異藉資鼓勵

十、榜示後所取列一二等之試卷社長或評議員得當面示以鍼渡俾得規臬

十一、本辦法自公布日施行

羣賢詩集

頌依都護守城事蹟 併序

宗室祥麟

麟不才亦嘗涉史乘覽東華正襟危坐撫卷神往緬想伊古以來膺
大任寄封疆勳猷彪炳代不絕書迄觀我朝開創以及中興人物表
表者尤難枚舉推原其故悉本家修廷獻之才濟世安民之略解倒
懸之難建不拔之功光耀旂常榮褒華袞懿歟哉何其盛也慨自江
河日下三十餘年老成凋謝宵小當軸凡一切國計民生安內攘外
諸大端任意廢弛毫無振作無惑乎甲午之役臺灣割矣庚子之變
鑾輿狩矣大洋以北無淨土遼水之右少完城通都奧衍比比皆然
又何論僻壤遐陬彈丸蕞爾哉絲是觀之而益服公之海龍戰守爲
甚神矣何則麟自託庇宇下已葛纘四更雖經極險之秋未嘗越境
苟免所以聞公謀畫見公焦勞數載情形歷歷在目縱佩服至三未

敢以俚辭相瀆也邇者幸謁軍門侍談之下惠貺戰守事蹟一帙退私展讀知爲羣賢歌功頌德之作見其格局高超詞華煥爛如登百尺樓入五都市珠寶光怪精彩陸離佳句如斯莫名其妙吁邊荒之地人文蔚起何若是之捷焉思之思之而後知公之培養風俗造就人才之力也麟雖不敏亦坐春風時雨中矣而能已於言哉所愧者筆難鳴鳳字類塗鴉勦說羣言勉成十律其一者頌公之發政施仁也其二者頌公之除邪崇正也其三者頌公之撥亂撫戎也其四者頌公之設伏擒賊也其五者頌公之收降致用也其六者頌公之臨城奏凱也其七者頌公之善後綏民也其八者頌公之掃邊守境也其九者頌公之興學造士也其十者頌公之指日榮陞也且也德足

動天也誠優格主也以公之德布公之誠必能出入將相勤勞王家澤被生民功施社稷勒之金石播之聲詩以耀後世而垂無窮此公之志而士亦以此望公也豈止夸一時榮一域哉侷乎遠矣

巍巍虎駕鎮東陲萬衆蒙庥頌口碑澤布棠疆舒美蔭仁敷麥隴現雙岐遐陬有福瞻天日伏莽潛踪畏戟旗豈止興京留善政名登會報動華夷

編氓正享太平恩何意拳妖妄自尊釁起外洋寒玉帛株連淨土苦黎元人無定見除邪黨公具全才斬禍根不信異端崇正道韓文朱晦可同源

三邊擾攘逼孤城籌餉籌軍幾戰爭蓋世雄心攻野寇包天虎膽迓

俄兵威加醜類皆聽命誠布夷酉亦順情試問聞風先避者臨民倨
坐屬誰榮

婆心念切拯斯民那怕跳梁不斂塵一二逆酉偏自首兩三良將盡
亡身席間伏甲誅豺豕闔外連兵逐鱷鱗大計驚人帷幄定如公智
勇可通神

草澤投誠接踵來請纓殺敵疾銜枚縱無糧餉甘酬效但有干戈卽
掃埃虎帳指揮真壯矣龍城坐鎮亦雄哉神威將將超劉季安得羣
英不展材

寡難敵衆勢危艱蟻聚蜂屯擁北山蔽乘能施宗澤令彈琴不改武
侯顏疲兵連日皆鏖陣狂寇如雲罔奪關更喜俄軍遲一夕膚功獨

奏唱刀環

善後諸端瘁匠心收軍辦餉老謀深烽煙頓洗飛鴻撫將佐分屯桀
鶩擒荒歲居然成樂歲憂忱誰不變歡忱感恩戴德千人口如此聲
威貫古今

數載勤勞布塞東天教亂世表英雄籌邊幾費安民志守土無慚報
國忠虞令才華能撫盜汾陽勳業在綏戎我家多少簪纓輩望見公
顏拜下風

庠序隆規自昔留於今此老亦文修上承古制希三代旁索奇書到
五洲大舉固宜前輩創榮名偏許後生求龍城他日人才出方識先
機妙運籌

曾左胡彭不再聞中興保障獨推君東藩已著昇平績北闕重頒卓
異文指日旌旄朝象魏望風金紫繡獅文彤廷定有殊恩降特受封
疆作制軍

同前

候選知縣王在鎬

九邊到處起烽烟惟我龍城更倒懸公有忠心能貫日誰言人力不
回天萬餘小醜同時掃一戰威名外國傳恩被四民無可報只將生
佛萬家宣

重圍城下火連天糞土之牆豈是堅事到臨頭操勝算賊雖大股詎
生全任專守土眞無愧情切攀轅感自然爲國爲民昭耳目流芳青
史定他年

無端小醜結連營未識公能敢逆行換鵝家傳追逸少牧羊塞上笑
蘇卿顧全大局終成志念切生民豈慕名欲把孤城方大廈而今一
本竟支撐

軍嚴細柳列新營忌我洋人爲統兵巧定牢籠離虎穴那知追挽徧
龍城還轅有信羣夷避夾道拈香當佛迎事過萬難功第一酬庸公
定作和羹

七律二首 併序

前人

官宜臨民宜與民相親不宜與民相隔我公於公餘好遊而商民無
不樂其遊非泛遊也商隱民情洞悉無遺得遊之力居多使爲官者
盡如公之遊而街市有不肅清商民有不被澤者乎因不揣俗俚成

七律二首聊以誌公之遊

傳言都護好閒遊那識閒遊妙運籌大小事逢當面判賢愚人過早
神留奸徒罔利難行詐宵小聞名豈敢偷不使威權驚百姓真情善
用笑談求

公餘飯後走西東街市何人不識公剛毅渾涵和悅內經綸都寓笑
談中周知利弊無虛日暗訪奸邪息盜風豈是等閒遊可比關心好
惡與民同

古歌

前人

我公愛民不愛錢忠心如日筆如椽海龍有福開幕府小醜殄滅民
安然不料禍端起拳匪繼而潰勇竄東邊宜勦宜撫公早定以毒攻

毒策萬全賊心叵測弄詐權不動聲色便開筵計比鴻門險更隱元
惡授首身命捐餘黨假名復仇緣龍城四面起烽烟槍勢若林彈飛
雨砲聲振地火燭天誓守公將忠義宣衆寡不敵勢相懸獨運神機
人莫測調來飛將內外連烏合之衆不支焉如鳥獸散奔且顛孤城
依然全無恙金甌無缺月再圓賊敗洋人又來纏懼公忠勇嫉心偏
暗中安排虎離穴何異金牌調岳還商民間信共涕漣尾隨懇留詞
連篇真誠感通大憲意放公回任莫遲延迎公不啻迎佛仙父老兒
童里巷填共道公去沸如鼎公來雞犬亦安眠吁嗟乎公之智兮似
前賢武侯空城可比肩公之德兮仿古先召伯甘棠思之專紫電青
霜宗武庫銀鈎鐵畫紹家傳四民報恩一氣聯請爲立石將功鐫龍

郡青山環其後柳河綠水繞其前青山北峙功常在緣水東流名不
遷我欲比公羊叔子墮淚之碑壽且堅今而後公與山川同不朽那
計世世復年年

頌依都護德政

附生王之英

海外名爭都統傳譁言忠勇占人先萬餘巨寇同時掃一戰空城立
刻全豈是賊心甘避地依然君力可回天自今大德民難忘生佛家
家頂祝年

雖云招忌去龍城羣仰將軍善用兵敵國總謀施狡猾巖疆仍許任
縱橫百千小醜還轅掃億萬氓民夾道迎設與嚇蠻功較比先生應
賜御調羹

七言律六首

舉人奎斌

壯年書劍苦經營老握兵符萬里行
振筆直摹秦漢碣和戎早陋晉
唐卿逆天巨寇摧肝膽環海羣夷識姓名
不是生民好諛頌乾坤大局尙誰撐

羣奸尼止枉鑽營還我將軍舊統兵
欲爲危時撐大局益堅壯志作
干城軍民鼓舞延頸待父老馨香夾道迎
幸喜先生歸未晚不然海宇沸如羹

憶昔環城畫角哀孤軍力擊逆圍開
縱緣部屬勤王事畢竟先生有
將才一戰威名驚海國千秋功烈耀雲臺
中原倘盡如公輩安許夷酉作寇來

城修雉堞砲修臺早識東隅伏禍胎患難身經雄膽略太平手定妙
心裁堅持半壁全生命宏獎羣英無棄材更有高人清勁節功名不
事利中來

光明豁達闊胸襟濟世經綸蓋世欽時變興戎威不測民飢移粟慮
何深愛兵幾灑英雄淚勸學恒殫士子心若買新絲繡生佛寒儒也
願費黃金

滿卷琳琅實蹟呈文經武緯兩分明恭揚駿烈非虛語感集騷歌見
下情宇宙大名垂赫濯春秋一字定褒榮不才幸廁門墻列莫狀徽
猷愧筆輕

唾壺擊碎劍光紅聽我一歌大英雄英雄者誰惟我公奇勳特著冠
遼東憶公年少起甲兵智勇兼優天授成百戰百勝統軍旅國家藉
以衛神京忽聞塞外起烽烟特詔將軍來定邊將軍一蒞龍城任數
年上下樂安全孰意拳匪遽爲亂致使中華一大變俄人傾國渡江
來關外三省幾失半宰輔無策惟議和激成土匪起干戈潰勇因以
結賊黨雖有民團莫奈何當此時本萬難時乾坤大局誰維持將軍
毅然奮忠勇備戰特募義勇師巖疆建節帥旗高報國收得衆英豪
共作干城資捍禦豈容小醜恃天驕何期隣封失防堵東南半壁失
門戶幾番委曲策萬全誓與君王守此土狂寇求和暗擊摧將軍大
度更恢恢杯酒爲歡喜相見談笑之閒殲巨魁從此群賊憤不平相

糾大股來攻城漫山遍野長驅入殺氣騰騰百倍增將軍有識並有
胆穩如泰山實難撼大呼殺賊共奮威靈戰連霄天地慘登城布陣
一身先孤軍鼓勵一當千踴躍甘欲死效命賊雖萬衆不敢前尤復
星馳調勇將勇將匹馬來天上截賊爲二賊心驚棄甲曳兵難列仗
士卒奏凱得勝歸逆賊面面又合圍馮劉二傑尤奮勇猛如彪虎陣
中飛馬頭到處死無數遠者逃生各奪路砲聲轟轟隨後追鼠竄狼
奔不回顧賊北敗酋潰亡群陣前息鼓始收軍彈丸危城依然在又
報洋隊至紛紛洋員一見咸嗟歎謂入中原無此戰從來犬性不服
人欣羨喜會將軍面胡爲一朝忽生忌竟欲將軍離此地自聞旌旆
回省垣闔邑軍民咸悲淚流寇聞風復跳梁邊沿戎馬實倉皇蒼生

之患深水火望公恰似雲霓望幸喜天心誠愛民不忍荒服失能臣
狂瀾既倒孰可挽特俾我公返征輪還轅生佛頌家家父老歡迎夾
道遮旗旄遙臨先聲震出師立靜亂如麻露章報捷叙公績卓異勳
勞數第一試觀今日扶危時一柱擎天更誰匹笑他當軸諸元老各
奉王師申天討翻讓公成不世功海內豪傑都推倒將軍好武又好
文草書運腕生風雲文武兼資眞將略贏得英名中外聞猗歟哉英
雄如公本絕倫漫云圖畫上麒麟行表丹青垂青史千古於今有幾
人

七律二首

附生孫瀛

殘軍數百破連營克敵成功令自行胸具甲兵稱范老城中屯草法

眞卿亂華螻蟻皆捐命應世麒麟早擅名掃盡塵氛東土靜擎天柱
作代鰲撐

感神以德苦經營天命依公總舊兵孰使虜氛消絕塞都因衆志結
成城威揚寰海群夷嫉澤望邊疆活佛迎暫祝先生留是地會看北
闕詔和羹

七律二首

府學堂
肄業生孫麟慶

荒墩數百息狼烟色變風雲力挽天逆命難逃三尺法詔歌頓奏五
音絃瘡痍赤子邊庭撫塗炭蒼生海國全德被蒸民同再造榮膺帝
眷候傳宣

將軍力効蓋臣忠克敵和戎兩奏功飛隼歌詩方叔化揚鷹奮績太

公風重施雨露三邊外徧掃塵氛四路中世慶昇平民樂頌茫茫四
塞荷併幪

七律二首 併序

附生馬殿甲

竊以歌功頌德感守土之奇勳摘藻揚芬乃斯文之韻事况親霑惠
雨如坐春風尤爲情之所不容已者客秋奎孝廉頌立翁恩憲老大
人七律二章都人士爭相傳和一時播爲美談甲亦擬步其原韻以
附驥尾但愧無才難免貽識者笑故爾遲之數月未敢著筆昨由鄉
來城旅館蕭條寒夜無眠偶有所觸其原韻猶能彷彿記憶僅勉成
二章以獻醜雖紀實功難稱佳構用叙篇首待高明以備斧削云爾
龍城半壁賴公撐智勇兼全慘淡營下筆有神推草聖棒圖辱命笑

荆卿掃平烽火洋員忌望切雲霓父老迎善後萬難心更苦半籌精
餉半收兵

數匝重圍百里營烽烟到處沸如羹三年兵燹驚秦火一旦絃歌徧
武城寄命獨能全大局成功豈是博虛名孤忠不朽山河在羣祝公
陞怕早行

七律二首

候選
縣知

嚴紹陵

自從蒞任獨經營王事勤勞逐日行化洽棠陰追召伯興來草聖慕
眞卿龍城歌詠爭傳稿麟閣功勳早著名何況猖狂群小醜妖拳尙
不敢支撐

大幫烏合也成營詎料無兵尙有兵最惜千軍徒廢命那知一戰枉

爭城笑他俄隊途行緩
溪我王師簞食迎如此
功勳誰與伍移時待
詔賜龍羹

七絕四首 併序

海龍府孫壽昌

一行作吏不談詩文久
矣然見獵心喜偶一爲
之結習未忘聊復爾
爾不足道也原韻東冬
通用固無不可三百篇
與漢魏諸作具在有何
體例遵何音律乃有遇
其字音聲牙者雖爲之
叶韻是但知五方之音
不同不知古今方言字
音亦有同異經傳又具
在也古人讀書不受古
人欺居今稽古更不可
受借古人以欺人者所
欺或譏出韻姑勿與論
取老杜詩呼令多讀

漢相憂邊似弱翁也如
吉甫奏膚功將軍平冠
應無敵智勇原來作

劍鋒

阿蒙自笑信天翁
捧檄遲來但賀功
願與勒銘摹萬本
千山禿盡紫豪鋒

文中虎亦人中龍
莫與爭雖莫比功
蠢爾島夷初不省
終須却立禮於公

不盡爲豬竟是龍
同叨主豢獨成功
大邦敢謂無人在
今日東京有鉅公

古歌

開源貢生 段德峯

將軍用武不好武
緩帶輕裘丰裁古
奉召蒞茲海龍城
維屏維藩開幕府
洋人入寇地方驚
流賊烏合連卒伍
一時藐法將城圍
倉卒誰

作中流柱謀共同寅不辱命誓與天王守此土一聲令下驚天雷竭
力守城惟本部軍勢纍卵城彈丸敵兵如林彈如雨關鄉莫辨起烽
烟雞犬不聞聞擊鼓析骸易子幾希時忠誠終邀天之祐背城借一
出奇謀暗調援兵勢如虎一戰功成賊四奔蟻推蜂擁難細數小醜
已摧孤城完依然明珠還合浦俄員畏忌生疑心竟在當道用惑蠱
金牌昔日誤元戎今見君回民無主仕已之間豈關心奈此地方誰
鎮撫商民懇留赴省垣職闕還須仲山補旌旗回向車馬迎父老攀
轅兒童舞將軍若此得民心早同憂樂並甘苦中原盡效將軍行定
掃烽烟清海宇懿歟哉武將能文諸葛公三代之上尹吉甫何若公
紫電青霜承其先銀鈎鐵畫繩其祖

七律七首

附生王承不

國匱城空苦練兵，神機籌餉費經營。
商民仰賴公司設，市井通資官帖行。
錢返窮鄉蚨宛化，水流涸轍鮒重生。
雖加師旅因饑饉，有勇知方教已成。

澄清有志洗乾坤，人合三千效虎賁。
豪傑心歸軍復振，英雄氣聚賊平吞。
勳垂露布同膺賞，位慶彈冠共沐恩。
力荷栽培欣待詔，滿城桃李在公門。

報國心懷一片誠，武功甫定振文明。
尊賢禮尙分庭抗，接士情殷倒屣迎。
敬具肴核邀下客，恩加膏伙助諸生。
登門共切攀龍願，化起絃歌聲滿城。

關心赤子救年荒法用常平仿漢倉市備餘糧周困厄商邀重價制
豪雖舟車轉運通千里道路流離慰四方孔邇興歌思父母聲聽萬
福頌無疆

幕府雖非治獄臣呼冤何忍置斯民糾纏立斷紛紜解剖決如流憤
惋伸照物無私心似鏡觀人有準眼通神安良除暴皆仁政愷澤旁
流四海春

一帶圍荒辟草萊與民同樂北門開城池補固通橋路壁壘增高起
礮臺色變旌旗生浩氣精操弓馬選良材其猷克壯稱元老爭羨此
翁矍鑠哉

力挽殘棋一局終編詩未足贊成功澤通滄海波光遠績比恒河沙

數同爲政德如星拱北歌風化洽水流東識荆雖切龍門望技獻雕
蟲愧我公

邊城坐鎮矢孤忠儒將偏成汗馬功鐵畫銀鈎名士筆綸巾羽扇武
侯風金湯固國山谿外衽席登民水火中寰海家家生佛祝恩同再
造感併幪

三年零雨洗烽烟再造山河半壁天兵氣重銷秦苑火歌聲徧起武
城絃功收降虜邊塵靖策守和戎大局全指日中興扶景運風追吉
甫佐周宣

沙場鏖戰苦風霜抗敵威名震北洋自恨事人供犬馬誰知當道遇
豺狼褫韓南渡千方迫借寇東歸一路忙故國山河重表裡金城依

舊固金湯

冰雪聰明松柏操心憑忠信涉波濤櫛風沐雨興師苦戴月披星出
塞勞籌畫多方窺管葛指揮如意笑蕭曹書勳應載春秋筆袞冕榮
膺一字褒

七律六首 併序

附生 宋乃璟

竊思論事在承平之日不足以定品評觀人在危急之秋始可以覘
梗概昔人云世窮見節義時亂識忠臣良有以也溯自庚子之變強
夷日侵盜賊風熾凡膺封疆重任求一確乎有不拔之操者其人固
已寥寥至若我公誠有超出尋常萬萬者矣以蕞爾之區值危難之
會獨能從容坐鎮卒致太平此其功抑何盛歟譽焉何加不譽何損

尙奚取乎瑣述哉况乎卽欲託諸詠歌表揚盛德苟未深悉事蹟恐
略言之而有虧本量詳言之而未溯淵源此雖頌與不頌者等幸也
重荷關垂不遺薄植將諸賢名作賞給捧讀並諭校訛聞命之下不
勝悚惶猥以質本凡庸慙無識見雕蟲旣久刻鵠無成誤豕不知蹲
鴟莫喻詎敢以管豹之窺謬認魯魚之辨哉惟叨隸併幪渥承恩植
倘外生成之德不伸頌禱之懷豈非戴山而不知重飲水而忘思源
者乎是以不揣固陋謹就諸賢恭頌事蹟勉綴數言希附末光以表
感戴之心云爾

共道將軍智勇兼華夷並處免猜嫌攀轅父老殷勤至籌餉兵丁惠
澤霑去後幾番思借寇來時何暮憶歌廉若非往日深仁被何以人

人共仰瞻

平時講武並修文學問經綸廣見聞戰列陣圖伸豹畧書傳家法換
鵝群邊城共樂無疆業彝鼎常銘不世勳視彼倉皇失職守此間軒
輟有攸分

雲霓望切出王師後我奚爲共一辭知是來時民被澤不然去後孰
興思孤城縱賴三軍守大廈全憑一木支景仰高風眞懍懍威加海
內姓名馳

時安未必顯忠良堅節宜覘危急場臨事好謀原鎮定沈幾觀變不
張皇歲寒然後知松栢性辣由來屬桂薑萬里侯封知有日功標青
史果非常

郊關四顧徧連營夙夜辛勤獨奮征卻虜籌邊安百姓受降畫策築
三城山河表裏無遺害朝野見聞著盛名自古忠勳誠罕匹羣思孰
可與爭衡

城池原不甚高深坐鎮雍容未被侵師克在和非在衆寇奔旋縱又
旋擒待勞以逸施良策轉弱爲強運苦心回首當年成軼事愧他失
職玷官箴

又七律三首 併序

庚子變後園法未通地面時形過窘庫帑支絀軍需甚覺維艱幸賴
我公創立公司開使官帖接濟餉源庶令內外無梗塞之虞商賈有
交易之樂况復發倉貸賑糶穀濟貧小民庶免鴻嗷中澤共欣雁集

如斯盛德枚舉良難略綴數言藉申鄙悃

苦心孤詣爲籌邊圜法疎通策萬全半濟軍需成勁旅一思賑貸保
居塵分毫利息工商惠出入和平子母權不是公忠能體國何由上
下樂安然

糶穀時當五月中誰知圖匱即於豐發棠不俟陳臻問指困偏思魯
肅忠旣幸閭閻安樂利何煩杼柚詠虛空未曾繼富惟周急無我原
來本大公

米玉初驚價值昂公心體恤費評章薦饑乞糶先防晉移粟爲民且
效梁接濟羸貧安樂土和平貿易諭奸商更期圜法流通久仰賴年
年設義倉

七絕四首

蘆蓬
生李樹斑

風雲際會慶從龍
經濟常留竹帛功
總攬英雄歸管束
權操生殺代天公

漫羨伏波矍鑠翁
邊陲克建老年功
而今都護軍威震
力守危城破敵鋒

在天成象卜飛龍
青史名垂汗馬功
寰海家家皆頌德
馨香滿道祝三公

塞上宏圖暢若翁
四民頌德復歌功
先生神武人難測
筆善藏鋒劍露鋒

又七律二首

烽烟告警遍遼東
獨守孤城賴是翁
皓首治兵旌奮勇
赤心報國矢精忠
四征羣望揚鷹勢
百戰專成汗馬功
爲問邊陲諸將帥
幾人如此老英雄

都護東征膽氣豪
邊城坐鎮建旌旄
三軍徧慰貔貅衆
六略精通虎豹韜
大敵不驚標氣節
重圍立破著勳勞
爲經患難龍門托
仰慕先生德望高

又古歌

君不見青霜紫電王將軍
家傳武庫蔚人文
君不見龍驤樓船下益州
橫江鐵鎖斷中流
古來名將垂青史
其人莫多如王氏
都護依公字立峰
今於我朝相繼起
緬維先世佐龍興
大功建樹盟府登分藉

漢軍傳譜系累代簪纓相敬承都護英明絕世姿協領補授釀黃旗
武將兼通文士事右軍書法摩詰詩昔年都護署興京轟轟烈烈著
威名大憲薦剡天子喜總管分符海龍城奉檄東來歲戊戌黎民遮
道同歡迎盜賊望風皆避匿士庶熙熙樂太平詎料庚子歲大變不
聞太平祇聞戰釁端起自義和拳蔓延遼東諸郡縣都護獨不信么
魔槍聲一試盡驚散噫吁嘻鑿輿西狩遼瀋亂哀哀小民遭塗炭都
護鎮守此荒城一片忠心凌雲漢旋聞中外已議和能將玉帛化干
戈惟有海龍災氛起一波未平又一波俄兵不時來窺伺更有賊曰
衆嘍囉民人無辜受擾害寇衆我寡奈若何都護剴切陳大義折服
其心懾其志權行招撫各投誠以德服人無疑貳單子無端忽背叛

烏合匪衆至數萬妄肆劫掠毒生靈將士聞風皆飲恨蹂躪邊陲數十城海龍孤城亦被困官吏驚惶欲遁逃都護昂然膽氣豪慷慨設爲守城計不畏艱險不辭勞炮聲震地火連天人民奔避涕漣漣眼望賊兵圍無數城中士卒不滿千誓與此城共存亡忠心一如張睢陽一日一夜與賊據義氣上可感彼蒼賴有豪傑解重圍懷公之德畏公威拚命遠來無二志殺敵致果馬如飛轉眼旌旗即生色望氣敵軍皆如墨背城一戰壯軍聲數萬賊兵盡敗北元老指揮壯其猷羣寇鼠竄各抱頭半爲潛逃半殞命城郊一帶列髑髏奏凱歌聲滿天地軍士執馘與獻囚都護總攬衆英雄酬勳行賞誘其衷力守危城支全局收兵籌餉奏成功功成反被俄人忌權調都護離此地遠

去省垣別經年軍民思之盡垂淚焚香頂祝都護歸都護不歸心如
醉盜賊餘黨復鴟張誰能勦除致平治小民哀切懇上游都護依然
復其位商民夾道相歡呼咸云都護來其蘇鞠旅陳師咸震慴盜風
於以清萑苻收撫降軍歸部伍都護用心亦良苦黎民復得慶昇平
熙來攘往皆歌舞都護運籌亦何神祇是經文並緯武問道古今有
幾人萬邦爲憲尹吉甫願祝都護卽陞除指日建牙於開府懿鑠哉
安得都護化作億萬身天下將帥皆斯人

七絕二首

併序

海龍
巡檢梁汝枚

庚子夏拳匪肆亂與外洋失和東三省夙多馬賊亦乘亂蜂起奉省
幾無完土辛丑夏初有巨寇劉單子率萬餘衆圍攻海龍城內練軍

甚少幸經總管依公於前數日招留吉林東山練勇數營名爲鎮東軍並新募之義勇軍均稱勁旅以千衆而敵萬衆出奇制勝謂之神兵也殺賊計千餘首級保護危城拯救庶民厥功甚偉因口占七絕二首以紀總管之德

海龍總管立峰翁帷幄良籌夙有功宵小猖狂千萬衆那堪此老鎮東鋒

將猛兵強屬海龍將軍從此立頭功寡能敵衆眞奇勝懋賞酬庸定列公

和原韻

知縣選王在鎬

胸中自有主人翁勢萬難時獨建功堪笑無知羣小醜跳梁竟敢強

爭鋒

烽火連天困海龍從容決策奏奇功
露章報捷天顏喜那個勳勞可比公

又和原韻四首

附生王之英

到處商民感立翁未曾識面早歌功
卽今時過城無恙猶說當年挫敵鋒

岡勢蜿蜒號老龍賊巢勦盡奏成功
而今鄰境同歌頌豈止圍荒賴有公

樂與民同學醉翁兵機默運鎮邊功
廼思坐保孤城力豈但能書講筆鋒

栽培士類快登龍
月課殷勤勸用功
都護兼權師長任
滿城桃李盡歸公

和原韻四首

舉人奎斌

禍福奚須問塞翁
天遺此老自成功
試看節府歸來後
疆宇何人苦敵鋒

經濟從來學臥龍
空城亦可立奇功
外夷將帥群欽服
應識中原尙有公

俄夷一自逾黑龍
誰保危城建大功
不使巖疆失片土
英雄到底是依公

虛傳痛飲抵黃龍
誰及先生建實功
自昔中原多上將
獨能將將亦

惟公

和原韻

附生孫 瀛

肯讓當年矍鑠翁
井蛙獨決將成功
無端螻蟻君全掃
烏合誰曾敢比鋒

膽大包身匹子龍
兵單氣壯自成功
無邊草寇緣何滅
一點忠心秉至公

和原韻

黃蔭槐

力保巖疆仗立翁
兒童父老日談功
鎮東營已降旗豎
流寇誰能撓我鋒

羞稱老子其猶龍
江左夷吾夙有功
將寡兵微能敵衆
勳高千古說

依公

和原韻

附生熙春

一代經綸屬若翁扶危撥亂樹奇功無知小醜輕窺測慘彼臨城血

染鋒

決策從容效伏龍一身當敵立邊功蒼生蟻命憑誰托人力回天賴

有公

和原韻

候選知縣嚴詔陵

不論兒童及老翁空城都說是奇功那知兵法傳諸葛更有誰人敢

試鋒

父老攀轅回海龍俄人枉自忌成功果然復覩昇平象不啻鷹揚古

太公

和原韻

監知 王鳳岐

猶是當年矍鑠翁外邦且服守城功環觀三省遭兵燹更有何人挫敵鋒

素精筆陣走蛇龍臨陣從容更建功一旦萬人橫掃盡將軍白馬也輸公

和原韻

知候選 朱文達

都言暗助有仙翁誰識公心用苦功默運兵機人莫測逃生小醜忘交鋒

從來風虎會雲龍良將投誠助大功感激都爲門下士愛才如命盡

知公

和原韻

附生李錫三

誰識邊城有臥龍赤心耿耿爲從公笑他小醜跳梁輩一戰成功讓
若翁

汗馬功高竟忘功輕裘緩帶意從容始知平寇非揚武一策方籌試
及鋒

和原韻

附生張壯猷

得失何須問塞翁但將人事補天功危城力保終能濟億萬生靈係
我公

占爻幾度遇潛龍舉似韜光匣劍封不效鉛刀爭一割太阿有待試

全鋒

和原韻

附生王蔭棠

犬羊踞虎與盤龍掃却群推第一功不是蒼生阿所好智謀當世孰

如公

智勇人皆羨此翁安民獨著冠時功雖隣何畏威如虎應恐將軍試

及鋒

和原韻

知候選翁壽

雄威如虎氣如龍一木撐支建此功漫謂先聲郭撫虜邊城今又見

依公

和原韻

徐廷賓

歸途父老笑迎翁共說心銘竹帛功莫向龍蛇誇走筆珠含應試善
藏鋒

樓高意氣羨元龍雅度渾忘汗馬功漫認胸藏兵十萬將軍武庫屬
王公

和原韻

學府景陽

將軍無敵指髯翁寰海爭傳第一功力抗強隣存體統他邦誰敢觸
英鋒

諸君痛飲府黃龍獨立三遙保障功爭進剡章蒙上賞勳聲卓著動
王公

和原韻

學府景昕

當世英雄推立翁
龍城血戰樹奇功
運籌帷幄無遺策
誰敢輕撓百練鋒

爭先附鳳願攀龍
海宇同歌汗馬功
三載經綸登月報
聲傳東郡一依公

和原韻

候補守

馬翰臣

宿將應推矍鑠翁
闢疆拓土豈云功
從來言戰先言守
休向庸流辯舌鋒

公瑾同心許臥龍
鏖兵赤壁出奇功
于今誰與東風便
惹得詩人說我公

和原韻

併序

廩生

郝玉璞

海龍自拳匪倡亂俄人賊匪日不暇給幸賴我總憲依公忠心耿耿
爲國爲民運籌帷幄決勝千里分司梁公於兵燹之際口吟二絕以
贊盛德多士於萬全之日回想萬難之時不覺勃動情性羣爲表揚
璞家居化日屢荷裁成夙抱蠡管之見時爲龍門之登捧讀諸稿不
禁咋舌僅附驥尾聊贅數言勉步梁公原韻亦以明表揚之意云
多士詩歌矍鑠翁我除瘦句百無功捧吟佳稿均稱恰愧與同人競
筆鋒

屢承明教附登龍枵腹聊傳汗馬功欲識使君眞德業遙氓世世祝
三公

和原韻

增生劉紹唐

龍城黎庶荷天龍
賴有將軍奏膚功
能使投誠諸勇士
甘心枵腹破敵鋒

都護常言白髮翁
林泉養志退成功
東山絲竹君雖樂
未必蒼生許

謝公

和原韻

侯選 巡檢 賈維丙

禍福無庸問塞翁
全憑此老轉移功
背城一戰扶危局
爭羨將軍挫

敵鋒

誰說古今一臥龍
奇才又見立奇功
外兵加額驚英勇
患息邊庭賴

我公

新譜七言律二首

張煥柏謹呈

兩大軍鋒震遠東龍城保障矢孤忠萬家烟火遺民福百戰河山再
造功虜拜汾陽欽偉績天生吉甫馭羣雄全遼劫後今非昨定爲蒼
生起我公

薦蘿忝許附松枝弱冠曾叨國士知幾度滄桑驚剎那半生書劍愧
驅馳幸隨旌節輸公義勉竭涓埃副厚期借箸願籌強種策十年教
養及暇時

七言絕句一首

自詠

奉委東來蒞海龍五年執事本無功寇氛擾害商民苦獎語紛紛我
愧公

記名簡放副都統軍功二品頂戴花翎副都統銜海龍城總管依

凌阿因追思海龍事蹟被衆賢士見閱獎語詩詞深覺抱愧勉強
惺句聊以塞責耳

代高鳴九壽王蘭亭八十生辰

爲舊十月初十日
七言長律二首

王蔭棠

共獻桃觴頌祝頻荷衣鳩杖耀良辰堂前槐蔭森森聳階下蘭枝簇
簇新能與鏗聃齊老壽堪同龍馬競精神祥光久駐輝南極晚景仍
佳豔小春芝嶺交遊高綺里蓬壺歲月蔚靈椿學優品藻德如玉會
入耆英髮似銀萬朶梅花爲契友幾經銅狄訪遺民蒼松翠柏凌寒
外更有金剛百練身

其二

人生不易是高年况又身兼福德全祇爲積勞甯梓里方能食報到

華顛連鄉遠祖陽明法禦侮倡修壁壘堅月照花村無犬吠雲收黃
稻有鳴蟬鴻噉還集仁施溥雀角調和怨釋前棗猷安期隔海熟桃
來度朔滿盤鮮靈光魯殿隆羣望舞彩萊衣慰綺筵莫謂桑榆爲晚
景籌添海屋正綿綿

理門求雨有應

丙寅五月六十餘日未雨田禾將稿且多生蟲人心惶恐無似各處求雨迄無稍應山城鎮
夙有在理一門事神甚虔頗守戒規其會長張君俊三名成才乃會同主教秦君諸人袒臂
跣足身帶枷鎖設壇求雨第三日果得雨雨日足余以其善之不可沒也爰爲長律以誌之

王蔭棠

久旱苗皆稿羣黎望欲窮豈眞憑信理能使感因公撲面塵盈尺啼
饑澤集鴻含辛禾半萎逢午語難工中谷搥將熟四方壇甚崇漸生
雲密密先隱日熾熾願乞霖爲澤奚辭刑及躬銀鐺黑被項枷鎖響
因風海倒波翻北朝藏蟬在東天高雖莫問誠至便能通疏是神霄

奏滋涵地脈融疾聞雷震盪白跳雨溟濛喜慰多農望欣占九穀豐
淋漓三日足鼓舞萬家同命本爲民請幸偏若自叢桑林禱可慕遐
邇頌奇功

久旱得雨

先緒戊申六月四十餘日不雨

前人

有擁中谷旱其乾徧地哀求徧地壇今日黃昏忽降雨露天舞蹈萬
人歡

龍城大雪口拈

戊辰八月

前人

昨夜雪漫漫孤城萬戶寒不逢賢令尹誰解問袁安

龍城弔古

前人

古城何代遺興亡不可知欲來尋往事茫茫問阿誰

柳河晚渡

清流繞郭漫生波
旁晚歸人競渡河
短棹搖搖柳影外
扁舟泛泛浪花多

頌趙縣長四十初度

劉情樸

宦海曾開介壽筵
一螺詩記老人傳
歌騷譜奏陽春曲
雛鳳官逢強仕年
會合桃蟠花滿縣
甘流棠芾樹參天
小河沿上稱觴裡
樓望鷗波拜酒邊

桃花浪裏送歸船
強仕初逢太守年
春暮不希曾點瑟
歌聲恰笑子游絃
浮文蓬亦高懸矢
示辱蒲休暫着鞭
政事由求齊祝嘏
蘭亭序罷晏羣賢

前題

欒慶元

堂開畫錦艷陽天四十初逢強仕年
滿縣飛花春百五流觴曲水客
三千詩歌嶽降吉人誕書好疇翻
洪範篇秩秩德音留宦海家風琴
鶴紹薪傳

春之花

欒慶元

春光幾度上花枝花怕春寒放較遲
若是一朝能解語芳心惟有蝶
先知

清明觀人掃墓有感

欒慶元

節屆清明客欲歸家家掃墓報春暉
松楸葱鬱籠新塚草木參差勒
舊碑淚血啼鵲將竹染紙灰化蝶
御風飛人生斯世誰無老轉眼荒

郊土一堆

春柳

劉情樸

不覺東風又到春剪刀裁出柳條勻腰支綠尙三分瘦眼界青逢十
倍新宮裏都驚眠起日橋邊偏管送迎人多情只有登樓婦愁鎖眉
梢悔皺頻

有脚春回日載陽風搖柳綠半纔黃青山路遠勞迎送碧水亭高望
短長旂掛遙知沽酒店烟籠深處讀書堂玉門關已通消息舊恨何
須笛怨羌

前題

欒慶元

柳色初黃半未勻一年一度一番新樹栽荒塞傳佳話衣染農汁定

潤身繫馬橋邊方送客聽鶯陌上正行人縱觀天下無情物隻眼偏
含滿眼春

東風解凍漏春光十里烟波柳半黃眉樣描來痕尙淺情絲掛處線
偏長毵毵碧影籠衣袂裊裊青枝佛畫堂莫惜攀條人已渺多年老
樹可生陽

聞鶯

劉情樸

飛來何處友求聲金縷歌中度玉笙細雨花開紅杏日春風人坐綠
楊城青山携得雙柑去翠柳還藏兩個鳴啼可莫教驚妾夢遼西好
到話離情

綠野欣逢雨乍晴垂楊樹裏暗藏鶯遷喬有意都求友遠陌迎人不

住聲聽去已增沽酒興啼詩偏惹賦詩情
交交枝上須教打夢到遼西那可驚

前題

欒慶元

春光明媚柳垂金幾個黃鸝嘯茂林鼓舌如簧
隨意弄歌聲促我遣懷吟何時再展遷喬翅
此處偏傳求友音陌上遊人尋不見低頭想
像綠楊陰

賣錫

劉情樸

社鼓聲敲春色闌香錫爭賣日三竿一肩擔壓挑藏市
十里簫吹聽倚欄啜粥有人炊欲熟投錢稚子買言歡
節將寒食清明近杏酪榆羹喜共餐

挑來春色綠
餳香喚賣吹簫入市藏
日到三竿歸未得
爲誰辛苦爲誰亡

挑餳香壓一肩擔
賣到街西轉市南
縱教都將春買去
爲誰辛苦爲誰甘

前題

樂慶元

活火炊餳榆柳鑽
踏春買到六街寬
香飛綠混花三徑
擔壓紅挑日一竿
買去錢都扶杖掛
吹來簫不怯風寒
含飴分得餘甘在
世味何堪苦辣酸

幾度膠餳火候完
天街高喚賣聲歡
缸中杏酪釀初熟
壺裏春光買不殘
門巷吹簫風送暖
人家炊粥食猶寒
匆匆節已清明近
購得桃

羹佐酒餐

過賣忽吹市上簫春錫香暖一肩挑人家且漫桃羹喚買去錢爭阿堵拋

端午節

樂慶元

大好春光轉眼過天中節至又如何蘭湯薦洛香雖遠角黍包金悶更多魄寄汨羅悲屈子帆沉馬當憶王勃家家蒲劍當門掛爲斬人間邪崇魔

懷鄭師康侯遷居孤山子

前知人

龍城聚首幾何時銳意掛冠賦去辭羞澀宦囊非自苦難通尺素倍相思家逢厄運多奇癖人到窮途少故知遙望孤山懷往事爲親爲

友並爲師

秋燕

前人

輕舞紅襟似葉翻香巢壘得始安然西風忽送烏衣去再盼春歸又

隔年

秋鴻

樂慶元

胡天八月景淒涼塞雁驚寒返故鄉何事南征霜露苦帶來秋色滿

衡陽

秋蝶

樂慶元

漫逐花殘寄恨長風流幾日又秋霜繁華閱盡無心戀欲向漆園夢

入莊

秋蟲

樂慶元

落葉蕭蕭八月中
籬邊草際咽寒蟲
世間多少不平事
竟爲何人訴
苦衷

病愈歸自省垣謝各界歡迎

兼酬晴樸見寄

趙縣長

漱塵

一病兼旬幸減輕
歸來依舊守龍城
空慚闔境流亡象
深負諸賢愛
戴情何日能除豺虎亂
他時得踐鷺鷗盟
耆英惠我佳章句
強和陽春讓鳳鳴

憶昨携琴捧檄來
正逢烽火上秋台
亦知欲報三年政
自問慚無百
里才
幸有異材勤輔導
敢隨鄉老強追陪
幾時藉得東風力
淨掃萑苻共舉杯

芍藥

趙縣長

漱塵

遼天五月柳如絲
春色來遲去亦遲
芍藥一枝迎我笑
山城也有賞花時

小園

趙縣長

漱塵

小園深鎖綠陰中
日映荒亭一角紅
嬾聽鷄聲鳴時上
願隨蝶夢過墻東
花嬌初洗如酥雨
柳弱難禁似剪風
對此渾忘身在客
春光也與故鄉同

苦衷晚眺

趙縣長

漱塵

邊城晚眺數滄桑
一度滄桑一斷腸
幾處炊烟迷燕雀
半山返照下牛羊
莫憂方寸膏盲疾
未了浮生傀儡場
萬種閒愁收拾起
悠悠都

付黑甜鄉

敬和縣座病愈歸自省垣謝各界歡迎

兼酬晴樸
見寄原玉

張述

捧檄歸來馬足輕福星依舊耀龍城一般吏遣催逋賦十里郊迎話
別情憂國憂民存隱念除奸除暴誓初盟世人不識斯時務猶作含
飴鼓腸鳴

一片婆心宦海來拯民水火上春台天生已抱清兼志政治都關經
濟才幸荷鴻恩加指點得居夏屋笑顏陪明年祝壽逢三月爭獻花
前酒一杯

前題

樂慶元

斯民爲貴祿爲輕無采薪憂返縣城四野春耕催舉趾萬家浩劫最

關情清風兩袖兼明勵白水一心淡泊盟他日再施鸞鳳志冲天羽翼任飛鳴

一路福星回縣來春風花發上瑤台襟懷已勵淵明節政事還超冉有才尚望高山頻仰止亦隨屬吏勉追陪何時得到清平世鼓腸謳歌樂舉杯

步縣座詠芍藥原韻

欒慶元

莓墻天棘蔓絲絲春暮花殘賞已遲芍藥初開含醉態似曾盼到太平時

步縣座小園原韻

欒慶元

閒來散步小園中蝶舞蜂狂緣映紅半畝方塘臨院北一枝文杏出

墻東日高纔欲開荒徑世亂誰堪挽陋風雲物無殊鄉國麗山長水遠也相同

步縣座晚眺原韻

樂慶元

蒼茫樹不辨桑楊四望關山痛斷腸一水停舟銘野雀半天欲雨舞商羊騷人最賦繁華句俗士徧登熱鬧場試問世間名利客誰能富貴不還鄉

趙縣長詩見示依韻勉成

劉顯平

曜霆

詩人自古本相輕誰肯同爲衆志城幸得推敲鍼砭指願追元白咏吟情高山流水誰知趣明月清風可共盟豈向班門爭弄斧無非天籟自相鳴

撫民民盡慶勞來方寸新開明鏡臺白雪陽春眞絕調黃絹幼婦本
奇才禪林最重萊公咏陝府還應魏野陪每遇塵鞅消散後悠然高
唱且銜杯

趙縣長病愈旋任答紳耆之作依韻敬和

前人

舉足彈丸繫重輕軍民協力擁孤城不經蕩析支危局安得忭欣洽
衆情戰守有方勞孽畫塵鞅餘事結詩盟回思往事都如昨猶覺笳
聲震耳鳴

父樹甘棠子又來兆民且喜步春臺官廉不借催科力政善徧宜撫
字才詩似杜陵難屬和客非魏野愧相陪良辰美景休輕擲綠暗紅
深酒一杯

和趙縣長午節歸署詠庭前芍藥

前人

隨車甘雨落絲絲莫道雙旌歸覺遲
今日花開人盡賞野芳雖晚貴
知時

出城觀異卉

前人

不從田畝事農桑徧地花開並結囊
豈是葫蘆流玉液果然指頂出
瓊漿遊人逐隊非觀稼戲蝶翻飛誤戀香
綠女白婆皆立野一番辛苦爲誰忙

宣傳途中偶成

前人

古道登臨思悄然惱人天氣雨中烟
牧童驅犢循山麓稚子插秧傍
舍田幾處風光無限好一年花事有餘妍
講員也感跋涉苦不受人

憐亦自憐

宣傳途中即事

前人

埋首案頭對短檠
出城工作馬蹄輕
傷心最是花初謝
風景宜人雨乍晴

一肩行李恨飄蓬
四面野花黯淡紅
倦馬泥中爭上下
鳴蛙水際任西東
黍肥葉密偏宜雨
柳弱絲多慣惹風
桑柘廢來民菜色
蕭然到處總相同

梅河逢故人夜飲

(政治宣傳至梅河口)

前人

徂暑過征又一回
梅河又覆掌中杯
滿懷盡是滄桑感
撫劍長歌逸興催

天陰日暮宿山村細雨濃烟月色昏故友寒暄情最洽傾心眷顧語
多溫茫茫世事誰能料黯黯浮生何足論樂聖銜杯謀一醉如天大
事了無痕

趙縣長赴鄉宣傳政治時乃天久不雨啓行忽降甘霖詠此誌

之

大同二年閏五月下浣

前人

勤政無心問落花課民務使種桑麻康莊迢遞輕車少村落寂寥感
物華偃草德風慰衆望執戈猛士擁高牙雙旌到處人歡暢昨日從
容歸晚衙

伏初亢旱暖風侵幸得隨車甘雨淋四野鮮花夾道綠萬山煙樹迷
雲深行旌高唱皆佳句僚案同酬盡好音公罷歸來尋往事地方民

瘼最關心

鐵盦詩集

秋日郊遊

郭維耕

山村日暮噪寒鴉
深谷崎嶇鳥路斜
幾棵蒼松楓樹裏
青紅艷似晚春花

其二

前人

秋山暮紫豔如妝
塞外風寒野草黃
長嘯一聲天欲晚
驚飛野鶩起橫塘

晚遊萬泉紀事

前人

木葉經霜早蕭蕭
滿樹聲夕陽千里色
秋水一天晴笛弄晚風
細人

來夜月明欲歸迷舊路寂寞野煙橫

其二

前人

池塘飛野鷺山寺晚鐘沈雲斷透寒月風高響暮礎菊開殘暑退荷
卸嫩涼侵蕭索隄邊柳歸來一徑陰

秋興

前人

邊城聽却晚鐘殘寶篆香沈客味酸萬頃江田迷落照一簾煙雨逗
輕寒雲橫重嶺關山遠霧散遙天風月寬莫謂登樓秋正好閒愁寂
寞淚闌干

台安訪友

前人

不慣征途苦風吹草木稀天寒冰雪近歲饑犬羊腓墟里絕人跡荒

原看鳥飛停驂尋故友相見各依依

早春

前人

溪流活活一灣斜二月山村處處花
昨夜東風新雨足小園春韭半
舒芽

其二

前人

醉起閑遊眼欲昏鶯啼草長綠楊村
小園何事飛蜂蝶紅杏枝頭春
色繁

夏晴

前人

空庭草色綠入耳聽蛙鳴雨過雲千嶂
潮來水一泓隣雞曉向午乳
鴨浴新晴酒醉思無極陶然物外情

謁魏公故里
前人

魏公名變均字于亨又號鐵民銀州之名儒也生而多才好士性淡
泊坦直之詩尤擅書法稱一方之最忤於世遂遷居紅杏村不仕而
終

其一
前人

亂瓦頽垣廢墟幾家煙火雜樵漁一行衰柳斜陽晚不見先生墨
漬餘
前人

其二
前人

蒼茫何處拜儒尊茅屋家家白板門
花村
却此中山水好一犁烟雨杏

其三

前人

舊跡淒涼不忍過當年勝事問如何
欃槍滿野斜陽暮悄聽兒童唱
牧歌

除夜懷舊

前人

潦倒頻年俗累縈無端悵觸愧平生
鎗鑪美酒新詩味月夜清風故
友情倦鳥思歸尋舊隱懷人飛夢到邊城
流光轉眼成今古坐待燈
紅報歲聲

頌趙縣長

時萬選

海龍縣立女
二師中校長

記得攜來只鶴琴官囊歸去亦無金
乍逢巨變才堪應力解重圍事
可欽災歉連年勞救濟絃歌未輟費
思尋情深淵海難甘默擊壤謳

皆載道吟

志氣軒昂胆氣充
龍城一役慕勳風
甘棠繁蔭春秋庇
喬梓聯暉教化同
民瘼繫於醫國手
政聲遠且溢詩筒
一門德沛三邊渥
昔頌高堂今頌公

經術文章咸粹精
恩威並重守龍城
舉賢錯枉懸秦鏡
應變隨機秉玉衡
救濟災荒煩設計
薰陶頑懦亦關情
行旌遙指銀州路
夾道絃歌聽有聲

讀史書後

王春鵬

湘江

仔肩得卸願初償
一事無成兩鬢霜
壯志未酬酬晚志
紂王不遇遇文王
蒼生久切甘霖望
白髮還期大任當
昂首南溟天地闊
八千雲

路任翱翔

自況

前人

花開花落又殘春
飄泊誰憐失路人
我性愛花情愛酒
願花長艷酒

長醇

乞休

前人

聖明許我臥江湖
晝出耘田夜讀書
最是消閑風月夕
得魚盈網酒

盈壺

有感

前人

田園歸隱後
晚景樂桑榆
昔日門如市
今朝孰造廬

同前

前人

掛冠歸菊圃高臥退畊廬不我窮途棄飄零劔與書

寄新任應君

舞鯤

前人

君慶彈冠我掛冠龍城相見各悲歡黃金有盡情無盡願作千秋管
鮑看

春晴

前人

百無聊賴一聲鐘拂曉甘霖澈夜風船泊清溪千頃碧窗開旭日萬
家紅穿花蝶自枝頭見採葯僧於物外逢秉燭夜遊良有以昔賢佳
興與人同

退職後

前人

一自停官去歸田願作農愛花有奇癖嗜酒無醉容志欲乘黃鶴身

先訪赤松滔滔烟水綠洞被白雲封

自豪

前人

吾年誰半百吾志尙千秋謂水一元老岐山萬戶侯

修縣志

前人

千秋野史筆能傳不愛功名不愛錢瀟洒江湖且餬口丈夫豈肯受人憐

春秋

前人

厭倦風塵謀自安發言罔避雪霜寒亂臣賊子盈天下不作春秋志不完

董狐

晉史官

前人

吾頭可斷史難更祇爲春秋大義明秉筆若無公氣魄微軀敢與廟堂爭

楚霸王

前人

泱泱高唱大王風躍馬橫戈出洛潼一戰勝秦霸天下八千子弟氣如虹

平生

前人

問我平生境遇何平生境遇太蹉蛇探囊莫怪黃金少托鉢偏遭白眼多愁借酒杯澆塊壘醉垂簾幕舞婆娑南來惹苒徒興謗一代英雄哭伏波

修志

前人

修志任何宏才難當此衝若非徵廣見奚克竟全功自與高賢伍欣
聞鳴鼓攻案頭草盈尺諸待殺青中

哭亡友

前人

交友遍寰區如君知有幾常爲擊筑歌不作吹簫泣生耽一甌酒沒
無半弓地子孫多式微已作窮途乞

讀史有感

前人

兔爲誰死狗爲烹早見留侯退職盟甫聚甲兵修戰壘正逢烽火上
秋城三年載鶴鳴琴地一片金戈鐵馬聲揮汗勞未揮泪去山濤時
作不平鳴

新秋

前人

百代光陰一瞬過秋來極目盼庭柯夜涼似水真如水雲淡於羅不
是羅深院竹籠驕日少夕陽簾捲晚風多牧童也解田家樂歸去猶
爲扣角歌

游千山

前人

老松危石瀉寒濤中有雲峰挂笏袍但願此生居此地尊如南面不
爲豪

秋光

前人

秋光展轉上牆頭幾度尋芳蝶亦愁待到滿城風雨近登高得暢一
鞭遊

八月雪

前人

未屆隆冬雪已飛
遼天八月雁南歸
何時得竟衡陽志
一覽江山草木肥

九日登高

前人

月圓纔幾日轉眼又經秋
未落參軍帽先登王粲樓
蓼蘘疎水國鴻雁起汀洲
與飲一杯酒同消萬古愁
洞庭留故爪蘇子記前遊
落木蕭蕭下長江滾滾流
欲徵巖穴隱稍解廟堂憂
月出東山上徘徊望斗牛

舊寓牕前三柳

前人

(一) 牕外三株柳迎風如點首
榮枯日與偕爲我知心友
(二) 我非錢學士卿是柳夫人
憔悴顏如是甘心不帝秦

(三)三年常聚首一旦忽分襟日與同眠起卿心卽我心

咏海龍

(舊爲園場)

前人

廢朝獵跡尙殘留想見君王得意秋今日打從園場過一犁春雨看
畊牛

花蝶歌

前人

花開蝴蝶來花落蝴蝶去蝶夢與花魂顛顛共生死人爲蝴蝶悲我
爲落花惜蝴蝶撲猶來落花呼不起夜來風雨狂金粉墜盈尺今瘦
昨猶肥一片傷心地離離種豆紅寸寸培根碧誰復哀江南江南王
孫泣

卜居

前人

舊家兒又卜新居行李郎當載一車貧病相携無長物床頭人與案頭書

自遣

前人

衰老尙圖功勞形案牘中黃花憐我瘦白首爲誰雄潦倒一杯酒飄零兩袖風探囊何所有援取劍光紅